

靈巖山人詩集

詩之創造非有書有筆而復有真性情者不能造乎其至  
靈巖山人夙秉異才幼承母訓於聲詩一事既童而習之  
矣迨魁天下官侍從遍讀石渠天祿之書又日歷機地周  
知各邊塞戰守屯墾諸務才練而識遠視古所謂胸藏十  
萬兵者不啻過之此其作詩之根柢也今讀其度隴以來  
吟草意氣激昂情文悱惻奇則石破天驚正則珠和玉潤  
調高響逸神味不窮若夫憑高遠眺望古遙集以囊括萬  
有之心胸抒篲絕千秋之議論行閒茂密字裏鏗鏘摘其  
片語單詞俱可卓然不朽至於憂心旱虐蒿目民艱述事  
感懷陳規僚友卽鄭監門之繪流民元使君之咏賊退無  
以喻其剴切也惟其忠孝性生刻以不負君親爲念故一

誠之積可以感天地而泣鬼神以之籲冥漠則甘霖立沛以之陳

黼辰則濺澤頻施洵有若操左契不期然而然者秦隴數千里間之民夷婦子罔不飲和食德慶再生焉其以培國家萬年之元氣而裕一門數十世之福澤者胥於是乎卜之矣他如前星夜殞長吟弔溫序之忠曉鏡春分永嘆深安仁之悼看雲憶弟夢破孤鐙陟岵思親情牽愛日祖德有述陸機作賦之年勵志爲詩韋孟傳經之歲胥其忠孝之緒餘發爲彝倫之鼓吹此名教中自有樂地而風雅後不乏替人者也世之論靈巖詩者鮮不以浣花一瓣香推之謂有神似而非貌似允矣然不知其所以神似者詎僅

由其書之富筆之健已哉實原本於性情之真乃致此也  
予弱冠游京師周旋於前輩諸老先生壇坫者久聞其緒  
論竊知津逮頃從南中解組東歸徬徨歧路靈巖體慈志  
相迎至署椒盤共對白首言懽衣我以豐貂之裘飲我以  
參苓之劑疾痛痼癢動息相關岐西養老之仁旣優且渥  
非其愛親敬長之思周流旁浹烏能懇至若是哉爰書所  
見於簡端以質天下後世之知言者乾隆四十二年丁酉  
首春石湖息圃老人張鳳孫識於西安節署

學之無盡境也業已勝於人而取於人將謂天下之美盡在是矣於此而殫才抑志冥搜獨往必欲升古作者之堂則甚難業已升古作者之堂矣又必欲怵心剗胃擷古作者之菁英而蕩滌其膚翳戛戛然呈露一己之面目俾古之人皆爲我用而不受驅使於古人則更難今夫窮居巖穴之士沉幽寂寞日以撰述爲事有所感觸輒寄諸篇什於是嗇其身以昌其詩寬其詩以成其學所謂窮而後工者求之古今亦未數數然矣若乃擢巍科登顯仕數十年數歷中外百僚待其師資蒼生待其撫鞠此雖親鉛槧近卷帙或有所未暇而況摘隱抉微形諸歌詠探奇境於古人所未能到闡密義於古人所未及見恢廓淳深日新富

有不亦難哉不亦難哉余庚辰同年進士多才儁之士其以能詩稱者尤衆靈巖山人揖讓其閒絕不少自表暴雖座主蔣文恪公秦文恭公諸老宿皆以公輔許山人山人今日之所措注諸公若前知者然然於詩或未盡知也余束髮卽學爲詩在京師交遊跌宕靡所不至而於詩獨深自韜晦故與山人昕夕聚首亦未嘗深言詩也乾隆五十五年春正月余訪山人於武昌督署始獲受山人之詩而盡讀之乍讀而駭繼讀而喜卒讀而恂悅飄忽如遊蓬萊方丈仙人之宮金庭扃而雲海靜也倏詭變化如海濤驟至雷霆震驚龍戰元黃羣怪出沒金鐵鉞而風雨晦也雲然如有所悲愉然如有所樂凜然如有所畏介然如有所

得爽然如有所亡自男女慕悅夢紅泣綠之情以達於君臣父子昆弟之大靡不形其肫摯焉自卉木禽魚春風秋月之狀以達於天地民物古今成敗之蹟靡不歸其陶冶焉蓋本之性情者至厚根之經史者至深助之以風雲嶽瀆之奇澹之以喜怒哀樂之變然後伐毛洗髓鍛鍊而成詩噫觀止矣夫天下事得之速者其傳必不久合之易者其契必不深山人之以詩稱及余與山人交皆三十年以前事迄於今年皆六十餘矣始能徐徐然盡出所爲詩以相質證然則山人之所以自待與所以待其友者何如深且遠耶山人於經義史籍天文地志下逮百家雜技之類俱通貫而纂輯之詩特其一端也乾隆五十五年歲在庚

戊夏四月既望年愚弟丹徒王文治頓首拜撰



靈巖山人詩集目錄

第一卷 古今體詩

硯山怡雲集

關逢困敦

琴操三章

題靈巖山館壁

古劍篇

玉階怨

采蓮曲

秋夜行婁江道中

寒山別墅遇王丈日初昱賦贈

虎邱步月坐千人石試第三泉

渡海吟

樂郊園十二景題沈子居畫冊

春曉臺

藻野堂

松閣

霞外

帆影樓

涼心堂

掃花庵

就花亭

浣香徑

田舍

竹屋

雪齋

詠井上古柏

旃蒙赤奮若

硯石山房

虎邱冶春詞十首

有房

折花曲

更衣曲

香夢齋春日雨中作

題徐徵君侯齋畫靈巖山圖卽用前韻

幽居再用前韻

楊編修文叔

繩武

先生索觀近製親爲評點獎

偕倍至卽座賦呈

遊馬鞍山登文筆峯展眺

月夜聽琴

訪隱者不遇

冬日郊行

柔兆攝提格

早春園梅欲放喜而有作

失釵怨

詠玉環

初夏

蕉花詩有序

題惲南田瑤臺豔雪圖爲劒飛二弟灋作

秋夜宿靜然上人房題壁

將遊西山書示同社諸子

吳企晉泰來邀李丈客山果王鳳喈鳴盛錢曉

徵大所趙損之文哲王蘭泉和曹來殷仁虎

集聽雨篷小飲卽席有作

盛丈青嶼錦出示蜀道集卽題卷後

月

蒿里曲三首

贈顧行人抱桐

陳塋先生

菊影

夜宿拈花寺

米南宮漢玉筆山歌

和諸竹莊

世器

表兄村居詩

歲暮山齋題壁

雜詩

紅梅

綠萼梅

自題慈闈授詩圖四首

有序

靈巖山人詩集卷一

鎮洋畢沅秋帆

一字  
續蘅

硯山怡雲集

閱逢困敦

琴操三章

月明霜林小山碧陰無有萬籟曠然遠尋抱琴獨往閱音  
沖襟非求絃聲思是德愔君子有行以微其金有感有觸  
以和其心

以和其心以繕其性以誠蒼生各正性命匹夫優爲堯舜  
猶病匪事易能厥理可證空山無人杳非塵境八荒橫陳  
萬古豎互

何古何今葆素蘊真溫如良玉肅若明神元風恬憺品物  
熙春遠山迢迢流水粼粼樂水樂山曰惟知仁吾聆其聲  
吾見其人

題靈巖山館壁

梧宮故苑硯石名山石城巉巉香水潺潺我有板屋十間  
五間竹簾不捲木榻常閒梅花壓磴古苔爛斑白雲數片  
無心往還一琴一拂不隱不官長卿慢世參軍閉關

古劒篇

寶虹洩靈秘灑削太乙使天陰嘯匣中冷光透千里霜飛  
鬼魅愁月蝕蛟龍死壯士一寸心湛湛照秋水

玉階怨



瑤砌蒼苔滑。珠簾夜氣沈。泥人明月影。轉入百花深。

采蓮曲

采蓮女。雙漿泊銀塘。雲約藕絲裳。清江十里香。笑掬荷珠翻不定。紅粉飄零如妾命。豔影太縱橫。風波一葉輕。妾身輕。花情重。芙蓉心。鴛鴦夢。

秋夜行婁江道中

空罽絡殘月。斷岸無人行。幾枝疎柳邊。微逗漁燈青。水村半荒落。竹扉向宵扃。不聞人語響。但聞犬吠聲。蕭然乍寒意。寫出江天清。幽懷縱孤棹。寂景澄空冥。更聞襟袖溼。篷背霜華明。

寒山別墅遇王丈日初昱賦贈

高人手蹟壁間遺勝地遊同老畫師空谷馳烟猶有驛上池

石壁鐫趙凡夫手書馳烟驛三隸字

孤亭聽雪可無詩

千尺雪有亭名聽雪

狀奇石作蛟拏勢

格古梅成鶴瘦枝

法螺庵前老梅二株係先生手植花開甚盛

山色僧窻真入畫乞圖

支許並酬辭

書譜載支許酬辭圖

### 虎邱步月坐千人石試第三泉

石盤陀寫一天秋山冷泉香帶月浮松韻長風喧蟹眼雲  
腴小壁煮龍頭元豐攪向新芽揀陸羽名從舊譜搜皓魄  
未沈花未落題詩重上仰蘇樓

### 渡海吟

金鳥飛著危檣頂驚濤汨沒扶桑影飈車御空穿龍滯鴈  
翼低垂鰲足迴浪頭山立迴罡風沈沈元氣磅礴平其中

紫瀾狂翻地軸裂赤縣環蔽天池窮蒼茫萬象歸一瞬恍  
如送我直到混沌未鑿之鴻濛笑予藐然滄海飄一粟天  
吳跳舞陽侯哭賦心那肯讓木華隱蹟底須問梅福上窮  
九天下九淵貝闕鮫宮卽我屋披襟擊楫發浩歌仰看雙  
丸如轉轂自有飛仙在世間等閒海水爭一掬同舟告知  
音聆我渡海吟奇士輕履險孝子重臨深壺中日月儘足  
供游戲幾時采藥遍歷三山岑成連海上或可遇水仙一  
弄聊寄三尺紫綺之瓊琴琴停潮落渺無極六合之外論  
不得魚龍安宅客乘槎水天萬古荒荒色

樂郊園十二景題沈子居畫冊

春曉臺

豔陽迴霽景百物總關情秋千人影外柳暗有鶯聲

藻野堂

殿春春益麗浩態錦幃遮姚黃傳異種忠孝相公家

松閣

羣松翳小閣陰晦日卓午松翠自四時松心自千古

霞外

蓬瀛收咫尺縹緲翠壁削麗景薄層雲飛仙何處著

帆影樓

海氣連東渤空濛島嶼微月明潮暗上林外片帆飛

涼心堂

身涼一扇忙心涼萬緣捨快哉此披襟聊砭執熱者

掃花庵

落紅陣陣飛春逐風雨去不見掃花人來到掃花處

就花亭

曉來對花餐晚來抱花宿滄桑劫外人消受看花福

浣香徑

幽香淡不流流蕩會心寫空谷雨聲喧紅泉滿階下

田舍

茅屋傍溪西前村草色齊莫問故侯第秋雨荒瓜畦

竹屋

精廬嵌脩竹宛入簣簞谷木榻幽人眠吟魂閃寒綠

雪齋

四望色慘淡千峯起悲風扁舟洞簫聲鶴夢追坡公

詠井上古柏

龍蛻藏金井無波貯一天蒼根纏斷綆翠影滴寒泉惠世  
資人養穿雲得地全予心鑒止水靜照湛雙圓

旃蒙赤奮若

硯石山房

書堂背山麓上有桃花樹石窻窻下泉流作紅雲去

虎邱冶春詞十首

有序

花天佛地香國人家占佳麗之溪山逢豔陽之節序  
魚腸沈霸業劒氣晨飛駕冢弔芳魂鬼燈夜出茲當  
蕙風初暢梅雪纔消掄花信之番番悵酒人之落落

滿座珠歌翠舞且往觀乎方春草長鶯啼維其時矣  
琴尊小隊欣邀結佩之盟鉤舄聯羣好趁湔褻之會  
綠楊村外金釵添幾架秋千紅燭光中玉笛擲新翻  
子夜萬花裝成錦繡百戲衍出魚龍碧落銀蟾寫月  
臺之鬢影清波畫鷁咽水閣之簫聲錦衾夢亦荒唐  
瓊管詞添旖旎雕梁燕子窺翠箔而舊壘全非流水  
桃花問仙源而伊人宛在一片雨香雲宕難浣情塵  
三更月落歌殘頓成夢幻感傷春之杜牧幾人憐填  
海冤禽聽說法于生公或我是點頭頑石聊吟麗句  
爰志清遊偶當對酒之歌用譜采春之曲

曲闌庭院燕初飛春鎖葳蕤悄掩扉昨夜雨酣香夢冷美

人消瘦杏花肥

平隄芳草碧芊芊香氣膏騰中酒天明月也隨歌管去夜  
深還照麗人船

酒旗低颺真娘墓茶室斜臨鶴澗濱檻外鶯花花外月安  
排總待討春人

綺陌相逢拾翠人輕盈流盼笑疑嗔風吹鬢影和花影撩  
亂心情認不真

上巳湔褻祓事修女郎連袂趁嬉遊銀塘無限垂垂柳怕  
結同心不到頭

榆莢錢輕難買笑海棠絲亂解縈愁珠簾一桁垂銀蒜不  
許飛花入畫樓



綠陰深處好藏鴉。斟酌橋邊蕩漿斜。錯怨錦屏遮。六六當筵，睂語勝天涯。

寶玦瓊鉤白袷輕。詩題摺扇贈卿卿。三年鄭重攜懷袖。零字猶應識姓名。

錦瑟年華轉眼非。生香微逗紫綃衣。夢闌金粉飄零盡。化作雙雙鳳子飛。

旖旎風情淡沲天。珣窗消息鎖嬋娟。漫將玉枕紅氍淚。傾向春波也枉然。

折花曲

曙色纔分百舌啼。數聲喚醒紅樓夢。花事關心急曉妝。開帷不管春寒重。文杏雙株映曲池。含情待折又遲遲。周遭

繞樹頻翹首揀取將開蓓蕾枝纖纖素手搖金釧梢頭驚  
起銜花燕幹老條生腕力微掣動紅英落如霰持歸繡閣  
伴蕭辰玉几銀屏劇可人風雨夜來聊自慰綠窻留住一  
分春

更衣曲

脈脈明蟾挂庭樹踏青女伴登車去鳳脰長檠燭兩行侍  
兒引入更衣處團花貼地毵毵紅曲房畫掩小雕櫳杏黃  
衫子熏籠覆漠漠香生石葉濃玉纓珠襍秋雲帔零星卸  
搭珊瑚架睡常不寐坐無聊愁絕江南寒食夜

香夢齋春日雨中作

閒居雨亦佳況復在幽谷天然入圖畫松樹老連屋舊醅

濁可傾奇書熟仍讀知有春苔生庭泥意先綠

題徐徵君俟齋畫靈巖山圖卽用前韻

應是隱者居屏迹向深谷四林風雨來波濤撼破屋書窗  
燈影紅何人夜猶讀曉起過山橋溪水如雲綠

幽居再用前韻

愛山學畫山寄情在崖谷泉聲松影間布置數椽屋息機  
耽習靜有書亦嬾讀笑指畫中山春風吹不綠

楊編修文叔

繩武

先生索觀近製親爲評點獎借

倍至卽座賦呈

綠衣隅侍最情親光霽襟期似飲醇門地東林鉤黨裔文  
章南國總持身汗青垂老書初就頭白憐才意更真海內

靈光遺一老

仁皇親策第三人

遊馬鞍山登文筆峯展眺

澤國走平沙見山等奇貨碧雲森瑤簪螺髻現一箇漸覺  
奇情賒難飮窮眼餓勢爭培塿高意敵嵩華大石徑穿楓  
林路迴峯顧左探勝遑憚勞涉險冒辭慳非猥訝升木似  
蟻任緣磨登高求欲速趾錯迭窘挫牽藤捫樹行十步欲  
九坐秋葉滿空山暫掃磐石臥百折出孱顏同人競稱賀  
上有古珠宮沙彌嚴戒課窳堵插霄漢傳是般仙作穿暗  
倏通明雲煙腳底鑣魂怯風輪旋手過日馭過賈勇立峯  
頂翠壁苔痕漉拂拭待題詩後恐無人和江郎夢一枝擲

去星斗破

月夜聽琴

虛庭貯涼月石几橫桂陰天風出冥際寫此太古音我母  
精琴理理在絃外尋一彈咽淒蟲再彈鳴栖禽泠然萬籟  
寂四座儼正襟山高而水流俯仰暢登臨如遇古仙人丹  
經旨互參草花秋淡淡書檠影沈沈琴絃露華溼不知夜  
已深

訪隱者不遇

煙波投老作漁翁家住吳淞東復東秋水到門人上市荻  
花灘外一罾空

冬日郊行

散目郊原踏淺沙偶裁詩句手頻叉  
山容慘淡天將雪籬角荒寒梅孕花  
僻徑葉乾聞野鼠孤村風緊入昏鴉  
舉頭更助游人興布幔斜飛賣酒家

柔兆攝提格

早春園梅欲放喜而有作

晴雪因風上曉枝偶開琴閣坐移時  
香聞了徹塵空後應認梅花作導師

失釵怨

豪門召釵工朝朝換新式貧女汲井墜銀釵  
一生照影無顏色

詠玉環

博雪凝脂竟體完潔貞終始抱團圓名應仙籍真妃得賜  
許窮荒逐客歡雜佩鏗鏘鳴有節畫簾宛轉恨無端須知  
一寸相思意慧劍雖靈割斷難

初夏

架上親齊甲乙籤堂虛風冷索衣添殘春晴好無三日高  
樹陰濃正一簾酒量獨斟疑忽小詩題次韻不妨嚴倚闌  
未免生惆悵牆腳殘花水半淹

蕉花詩有序

紅蕉書館前庭忽放蕉花一朶狀大如斗日舒一瓣  
現黃金色般麗溢目芬芳襲人清晨苞凝甘露味甚  
酷美自夏徂冬榮而不萎同人以爲文字之祥賦詩

紀異余亦欣然有作

膽瓶鳳尾異前聞忽報奇葩小院分  
瓣瓣金蓮輝寶相朝朝瓊露浥甘芬  
紅窻展卷花如火綠硯臨池影似雲  
慚愧懷中無彩筆空談靈瑞在斯文

題惲南田瑤臺豔雪圖爲劒飛二弟灌作

樹頭殘雪入虛室三尺冰綃萬花溢  
寫梅寫意兼寫香香在畫師心底出  
南田草衣妙入神邊黃夢予生花筆  
粉本得自香雪海香耶雪耶混爲一  
南枝北枝紛掩映千朶萬朶互蒙密  
移來名種定蓬瀛飛去瓊華麗景霽  
靈芬拂拂十指間奇境幽虛取質實  
想當蘸墨揮灑下滿幅香霏風雨疾  
黃月疎林冷硯屏淡煙棐几流緗帙  
翠石橫塞得蒼



潤數點經營化工畢香溪溪上我書堂簷外繁枝等比櫛  
畫中花似鏡中看真花反怕遭沈汨白鶴飛騫三素雲玉  
妃終古無靈匹

秋夜宿靜然上人房題壁

心燈宵炳佛燈明一息堅除百慮撻磬韻經聲同寂寂恰  
聞落葉證無生

將遊西山書示同社諸子

庭柯微風搖牆竹濃露滴爲有西山期起辨陰晴色屋角  
珠斗縣天心銀漢白四鄰雞未鳴深巷柝猶擊終宵夢不  
成及曙寐反適忽聞剝啄聲叩門來速客急起下牀迎拂  
衣還整幘紅日照清池回光動齋壁

吳企晉秦來邀李丈客山果王鳳喈鳴盛錢曉徵

大昕趙損之文哲王蘭泉昶曹來殷仁虎集聽

雨篷小飲卽席有作

寂寂園林夜開尊石閣西風池搖月碎露竹帶禽低獨罰  
輸棋酒重分詠史題豪情殊未已無奈五更雞

盛丈青嶼錦出示蜀道集卽題卷後

蠶叢闕荒古鏘鏘待詩人劒外青天遠燈前錦字新舟從  
三峽落筆借五丁神恍入連雲去鵲啼聽不真

月

風寒人定露無聲幾度添衣夜氣清九地月光同一片紅  
樓偏覺倍多情

蒿里曲三首

一息卽萬古長眠不知曉  
魚燈耿幽泉心魂餘了了  
松楸當鼓吹鬼狐訂交游  
懊惱笑人世樂哉有斯邱  
北邙冢漸平草深沒尋處  
月黑雨淒淒微聞翁仲語

贈顧行人抱桐

陳塋

先生

精力平生盡典墳  
眼中餘子日紛紛  
占星絕學推靈憲  
解字真源衍說文  
載酒花溪雙屐雨  
攤書松閣半牀雲  
吟壇簪盞無同輩  
每話前游感離羣

菊影

西風江閣月初更  
黯黯花魂悵落英  
秋老硯屏寒有色  
香橫琴薦悄無聲  
紙窻燈燼和人淡  
粉壁霜光耿夢清  
幾筆

雲麓先生詩集卷一  
殘枝餐不得柴桑高節寫分明

夜宿拈花寺

借宿經樓最上重夜分捲幔望前峯雲隨白鶴歸花塢月  
與清蟻挂礪松梵唄初停將伏枕佛燈欲盡忽聞鐘紀遊  
曉和塵牆句潦草留題墨未濃

米南宮漢玉筆山歌

硯屏冷帶芙蓉色扶寸瓊嵐爭劣崩土花斑璘古漆蝕匿  
影文房伴子墨漬血凝脂製樣精吟牀靜對一編青來從  
萬里于闐境刻作三峯華嶽形珊瑚品重徐家筆几席光  
分韓子檠瑰寶留爲奇士有何年落在海嶽仙人手巧偷  
豪奪未能知虹月船中結契久癖愛或曾袍笏拜洞天一

品應同壽潑墨雲霞散碧江金焦兩點排作窻中岫閱世  
流傳到玉峯寒門智守挈餅同連城價許侔荆璞故物天  
教得楚弓蠅頭鑄有元章字錦綈什襲稱珍祕古香繭紙  
寫樂兄予家藏南宮樂兄帖真蹟名石螺鬟供列翠山齋靈壁巨石背鐫米書列翠二字摩挲清  
玩暗銷魂月滿松寮悄掩門銅龍慘淡冰蟾泣爲有名賢  
手澤存

和諸竹莊

世器

表兄村居詩

屏迹煙村萬慮消數椽茅屋枕溪橋日光穿竹黃金碎山  
影沈波綠玉搖織就蒲團禪可學釀成桑落客堪招耦耕  
異日吳淞岸吟罷仍思抱甕澆

歲暮山齋題壁

羊裘曉禦北風涼  
山滿吟樓書滿牀  
不掃庭因殘雪在  
急開窻爲早梅香  
晝閒向客抄琴譜  
歲晚呼童峙鶴糧  
此日清光須領畧  
坡仙名語最難忘

雜詩

一事未知乃吾儒  
恥事事盡知誰測  
物理靜偃林泉博  
涉書史一耒一竿  
伊呂差擬不逢明  
時耕釣老死雲行  
太空不知西東一  
縷萬變變化隨風  
人生窮達安有成  
蹤淮陰袴下諸葛  
隆中琴聲劒影草  
草英雄

紅梅

薄暮開時倍有情  
斜陽一色不分明  
深庭莫謂無人識  
猶著紅兒是小名

綠萼梅

冷蕊疎枝畫亦難  
西廊鎮日捲簾看  
此間不似人間世  
青女臨風御翠鸞

自題慈闈授詩圖四首

有序

沉甫十齡母氏口授毛詩爲講聲韻之學閱一二年  
稍稍解悟繼以東坡集示之曰夕復誦遂銳志學詩  
同里張丈冰如爲繪慈闈授詩圖自題四絕於卷後  
用志家學所自敬感慈訓于勿緩也

虛齋月冷夜涼天  
口授毛詩三百篇  
爲語靈音天籟出  
不教色相落言詮

碧落光芒射斗魁  
坡仙遙繼謫仙才  
須知玉局聲名大  
原

本都從忠義來

黨籍名爭日月光圖中笠屐托詩狂蘇門源派由慈教綺  
齒曾誇學范滂

縮角趨庭抱一經風聲策策撼牕櫺仰窺畫荻恩勤意莫  
負秋燈一盞青

餘姚門人邵晉涵編校

靈巖山人詩集卷一



靈巖山人詩集目錄

第二卷 古今體詩

硯山怡雲集

強圉單闕

昭君曲

萬峯寺看梅花作

春陰行

春野行

晚春陪毛紫滄

商巖

先生遊弇園

田家雜興詩十首

讀韓冬郎無題詩因追和其韻有寄

再和倒押前韻一首

春遊入西崦山村卽景三首

詠靈巖古蹟十二首

日月泉

梧宮

琴臺

醉和尙

錦帆涇

響屨廊

香水溪

西施洞

石城

畫船塢

韓蘄王墓

浣花源

山塘泛舟

清明後一日看桃花作

山居雜詠八首

明鏡歎

玫瑰花

春暮偶成

過治平寺

學山園歌

靜逸庵

初夏小祇園對雨

同王石亭

鈞

何畹芳

蘭

訪毛羅照

上京

因同遊

隆福寺

邀友人石湖看荷花分得杯字

白鶴觀

德雲庵小憩四首

酒旗

歌板

花幔

書檠

古豔詩

秋江詞

燒香曲

秋夜西樓有貽

過湖上寺

淩雲閣望太湖

中秋山館獨坐對月感懷

枕上口占

捉雞行

臥雲庵

遊小桃源

戲詠泥美人四首

寒夜

長吟

靈巖山人詩集卷二

鎮洋畢沅秋帆

一字  
懷蘅

硯山怡雲集

強圉單闕

昭君曲

金莖露冷銅仙愁寂寞容華玉殿秋  
繚砌碧苔消履迹美人遠嫁花魂留  
披香陛辭一回顧緘怨請行痛誰訴  
枉驚豔冶世無雙紅顏翻爲黃金誤  
千山落日牛羊回漢月多情出塞來  
長門異域總淒絕流光萬里空徘徊  
人生難得兩心同爲妾恩深殺畫工  
丰容已荷君王賞圖形何必甘泉上

雕輪蓬轉愁無主馬上琵琶作胡語  
菱花妝鏡照離顏  
蟬鬢驚風涕如雨鴈門關外鴈南飛  
玉豔金釧逝不歸  
顧影自憐憔悴甚舞腰猶著漢宮衣  
龍堆雪壓氍毹重夢魂那戀  
豐貂雜臣不戰仗蛾眉紫庭萬古留青冢  
秋草傷心不下論  
謾嗟香骨委沙塵  
請看紈扇長捐棄誰識昭陽絕代人

萬峯寺看梅花作

古佛看常低寒梅笑不已  
卽此證禪參空色了終始  
境寂祛萬緣坐憑獨木几  
破殿兩三僧龕燈小於米  
微風引暗香攬入磬聲裏

春陰行



溼雲堆絮東風緊百舌喚春春不醒繡閣空凝玉鼎香雕  
窗失卻珠簾影樓指明朝值采蘭袂衣重御不勝寒壁間  
著潤琴絲緩庭際含滋蘚暈寬何心獨酌開瑤甕繡畫春  
光憐斷送行向林塘看水紋濃煙漠漠花如夢

### 春野行

昨夜三更走馬樓夢回雨濺鴛鴦瓦今朝被袂城西亭百  
尺游絲颺平野短短蘆苗刺碧流吳孃輕蕩木蘭舟撇波  
乳燕翻雙影隔霧春山鎖淡愁勝遊如此年來少曲闌不  
厭千回繞隄上褰腰芳草新湖邊人面紅桃小女牆一抹  
夕陽斜興盡爭旋油壁車雲屯碧樹鳴鐘寺柳壓青帘賣  
酒家獨憐入夜西園客更漏迢迢情脈脈銀燭燒殘金卷

荷樓頭貼玉涼蟾白

晚春陪毛紫滄商巖先生遊弁園

西鄰竹樹翠烟屯石徑苔錢滿屐痕布席談深應撰杖下  
帷業竟許窺圍敦槃江左流風遠鸞鶴曇陽暮雨昏月淡  
吟魂招不得梨花如雪掩重門

田家雜興詩十首

避喧厭近市屏迹幽期久予非學稼人農事心亦究江村  
屋數塵柴扉面南畝後植百本桑前栽五株柳疎籬帶石  
塘小閣瞰沙阜門絕車馬塵交密漁樵友日夕稻場閒行  
歌時負手興盡獨還家月出斷山口

曙光猶未白鄰翁起飯牛遠村連近巷栖雞啼不休披衣

倚柴門露草翠欲流負耒誰家婦逐隊向田疇斯時錦衾  
人香夢麗紅樓

一晴春驟煖彌望開桃花好風扇川原靄靄蒸紅霞誰道  
武陵源遠在天之涯卽此曲溪曲茅茨數十家籬落散雞  
犬叮嚀足桑麻絕無俗累擾但聞鳥聲譁不見問津人知  
被白雲遮

清明纔數朝茗芽茁金縷銀釵小村娃結伴向春塢一旗  
與半槍采采不盈筐亭午始還家家到販茶賈客從何方  
來自蜀更經楚屢黏棧道雲衣溼潯陽雨祇緣未利求備  
歷長途苦卻羨力田人足不離鄉土

麥秋候已至茲晨喜快晴處處築場圃連耒響不停村婦

信堂先生詩集卷之二  
二  
習勞慣力作勝健丁牧豎吹竹笛倒騎牛背行菜花黃斷  
處半塢夕陽明已有催耕鳥煙林一兩聲

數陣分龍雨陂塘水新足巡行隴畝間禾黍連雲綠牆腳  
臥桔槔蘚痕侵磳碌老農未慣閒入室檢筠簾蠹帙種樹  
書晨起課兒讀竚盼十年後清陰覆茅屋

沙村晚餐罷月出大于盆農人三五輩追涼楸樹根或自  
敘筋力或獨誇兒孫一叟稍知古因述幼所聞前代輕民  
瘼租庸甲令繁青苗未出土朱帖已登門難望全婦豎矧  
冀餘雞豚

清時薄租稅倉箱比屋屯兒女尙髫髻茶果已論婚蕃殖  
非爾力須念蒼天恩

霜降稻盡穫賦稅亟輸官所欣時暘雨衣食克苟完問訊  
親與友富歲有餘歡東鄰居嫠婦垂髻一子單秋末曳屨  
葛蕭瑟風聲乾自顧心力薄難拯汝飢寒殷勤諭家人早  
晚餉一簞孤鴻遠天際下上振霜翰日暮靡所託哀唳同  
辛酸

江鄉小雪天風景真樂土村塾小兒童書聲出環堵煖房  
壁新泥夫婦相爾汝連困堆黃梁巨甕釀清醕牛醫庸已  
酬驢券質方取夜來夢亦清眼前瘡盡補會須具黍雞叢  
祠賽田祖

歲晚務乍閒遣兒速賓客木脫草堂明堊乾板屋白火煨  
梢拙鑪座設蒲蘆席池魚及園蔬自有不煩索盡歡雜醉

醒招手較雙隻吾儕今不樂東作時且迫請看山橋頭數  
點寒梅塢

讀韓冬郎無題詩因追和其韻有寄

綺閣標青漢疏窻絕點塵簾旌常翠地鑪炷輒通晨釧齧  
金螭重釵雕玉鳳新濟尼談未悉周昉畫難真笑日桃花  
靨嘖煙柳葉顰隔年持別酒計日望歸輪花謝三三徑書  
傳六六鱗病懷多怯雨離思不宜春守約慵窺宋揚詩抵  
絕秦慧心原嶽嶽衆口枉津津持已如懷璧藏書愛袖珍  
長歌聲宛轉小楷格停勻解住雲樓室疑非火食人未曾  
通一笑楚客在西鄰

再和倒押前韻一首

初七及下九北里與東鄰綠桂携蒲院紅亭祓禊人玉環  
纏臂冷珠襪綴腰勻帶爲同心重釵因合股珍望夫將化  
石妬婦忽逢津壁幸終歸趙花原欲避秦含愁迎皓月作  
計餞殘春瓊盃斟雲液金盤膾雪鱗酒籌花滿把歌扇月  
盈輪擲笛能翻譜投壺恥效顰豔詞題處密暖語醉來真  
漸覺年華長潛悲物候新四時憐子夜千古羨劉晨擬欲  
修清福生天避劫塵

春遊入西崦山村卽景三首

水田漠漠劃僧衣白鷺雙雙上下飛漁父負羅牧豎笑教  
他怎便得忘機

繞園劈竹結籬笆門對青山落照斜最愛溪灣村複處一

層樓閣一層花

金縷鶯黃漾麴塵好風吹過踏青晨桃花傳豔鶯傳語只  
見秋千不見人

詠靈巖古蹟十二首

日月泉

山靈靈以泉石腦迸絕頂金闌繫銀餅人汲雙智井繁華  
洗不盡倒浸烏兔影

梧宮

溪山占佳麗虎視雄江東愁生歌舞場肘腋召女戎醉中  
秋已深落葉飄吳宮

琴臺



龍脣吟天風孤臺矗雲角美人彈瑤琴如奏無愁曲不聞  
引鳳凰但見走麋鹿

醉和尚

松翠結蒲團雲心抱石骨入定不再醒萬古頽兀兀笑彼  
飲中仙修成劫外佛

錦帆涇

翠羽漾春流棹入花深處眨眼霸圖空烟波渺何許畫舸  
載鴟夷亦向此中去

響屨廊

輦道蟠空曲虹影鏡中橫當年舞袖翻蓮瓣香塵生只愁  
天風緊吹斷步虛聲

香水溪

花香水亦香  
潌洞硯山麓  
烟鬟窈窕姿  
俯帶春波綠  
離宮開月鏡  
臨流理膏沐

西施洞

萬松寒翠交  
幽壑盤雲嶺  
石屋窈而深  
花枝曳明靚  
不見浣紗人  
疑是驚鴻影

石城

因山以爲城  
天作崇墉勢  
遺書紀越絕  
蛾眉多秘計  
一笑沼三吳  
金湯焉得濟

畫船塢

水嬉能蕩心  
彩鷁日縱橫  
冶遊多士女  
風弊闔閭城  
月明

青松林猶聞簫鼓聲

韓蘄王墓

穹碑勒殊勲草荒石麟死英雄出百戰運盡只如此愧殺  
雪國讐苧蘿一女子

浣花源

白石瀉紅泉其源不可極幽芳滿礀谷來自衆香國穠華  
此濫觴流宕幾時息

山塘泛舟

桃花三月水雙槳蕩波輕落日山更麗亂萍風自生旗亭  
名士酒畫閣美人箏我欲圖屏障繁華染不成

清明後一日看桃花作

偷閒補作踏青行日暖風柔春正晴遙望桃花香聚處紅  
雲欲傍樹頭生

一灣水碧數山青步履村村愛小停何況石湖煙寺外幾  
枝紅露壞牆亭

竹外橋邊爛漫時煙籠霧鎖總相宜仙源故實無人問但  
詠崔郎本事詩

綠楊垂處小妝樓簾爲人來上玉鉤多少尋芳經過客不  
因花好亦回頭

山居雜詠八首

用拙天機妙投閒道履寧風窻抄木序雨閣譜茶經花滿  
三三徑香深六六屏漫嫌清供少湖上萬螺青

島嶼縈迴處山村境不窮梅花青崦月蘭漿白蘋風雙屐  
孤雲外重簾淺夢中林泉足俯仰魚鳥悅心同  
紙窻松翠濕隱几坐蕭齋畫本峯峯換花籤月月排英華  
銷壯齒靈黠入奇懷風雨思良友芳期未許乖  
地遠塵蹤杳溪環石塢深清風梳亂竹涼月貯疎林獨往  
斷靈藥閒評到古琴水雲空一片底處著機心

畫闌雲四面書閣月三更沈碧心燈影淒清夢雨聲聚糧  
謀參鶴藏酒爲聽鶯閒櫂漁舟去江空玉笛橫

高潔存吾性疎蟬爾獨知春秋時最美晴雨景皆宜芳草  
心情遠寒花鬢影吹流光堪把翫未覺隙駒馳

墨池新露潤書幌晚颼侵骨帶煙霞氣文含金粉心華年

催鴈柱絕調感烏欽問字元亭近風騷有嗣音  
時歸愚先生家居居廬讀書老屋  
晞髮工奇服高冠怕遠遊觀棋忘勝敗說劍泯恩讎寂愛  
親禪榻名慚入選樓芙蓉溪畔侶終擬訂盟鷗

明鏡歎

水心雙龍鏡湛湛精光深但能照妾貌不解照郎心

玫瑰花

珍姿儘有玉堪方豔極天教擅異香曾見箇人簾下立者  
般顏色似衣裳

名入詩人握柘詞濃香浮動半開枝雲鬟遙望難分別紫  
玉釵頭並戴時

春暮偶成

不定陰晴春晝長閒情只辨送春忙  
平生曲水魚苗長花落新巢鳥夢香  
行藥蘚痕黏屐齒鉤簾竹影臥琴牀  
門無俗客心無事擬注仙傳辟穀方

過泊平寺

蘭若攜琴得得過閒尋梵語問多羅  
拈花有笑聞迦葉面壁無言怪達摩  
背樹樓高迎月早臨湖窻小占山多  
世間歲月風輪轉不與勞人駐剎那

學山園歌

燕泥零落重門閉看花偶到清河第  
龍漢潛移換劫灰文章元運同淪替  
勝朝末季溯東林黨禍株連痛陸沈  
餘焰未銷復社起並尊壇坫在東南  
敦槃結納知名士天如先

生執牛耳七錄齋頭擁百城高文價貴長安紙鴈幣填門  
走四方畫船十里接吳塘良朋風雅追長慶勝地林園壓  
洛陽新篇月旦前茅定珊網才名互爭競蕊榜元魁左券  
操朱衣不敢司其柄宜興復召預要盟祕計神通線索靈  
相臣進退由清議朝局艱危亦可驚道山仙去真全福轉  
頭明社忽已屋著述猶傳太史書姓名免入遺民錄客愁  
黯黯正傷春父老傳聞記不真石梁碧落垂虹影猶認先  
民屐齒痕牡丹未放荼蘼老落英滿地無人掃粉壁敲顏  
淡墨斜名公題詠留殘草圖書散伏化雲煙文采風流尙  
宛然三篆雕鐫埋鐵筆六朝麗藻賸遺編清流聲氣聯蘭  
臭君子道消大厦覆重叩雲莊記午橋空翻黨籍思元祐



蛛網縱橫罨曲廊夕陽人影立蒼茫莫話平泉興廢事芳菲曾閱小滄桑

靜逸庵

小園締構奇佳處在幽折規地不數弓名山了無別岡巒互迴映叢薄萃蕭瑟一池芙蓉花澹淡雲錦纈精廬嵌竹深老樹背窻劣粉本輞川莊洞天獅子窟昔人鑿平泉豪門豔簪笏糜此土木工未免金錢竭邱壑布置精傳是南垣筆州人張南垣中多太湖石輦至萬牛蹙約取鷲峯雲化作蒼龍骨滄桑閱人代過眼雲煙瞥田園盡入官斯庵遭籍沒板屋畫常闔綠苔繡鎖鑄瓦棱松鼠竄屋壁脩蛇穴狐狸作人形冶妝據華闥當年歌舞場寂寥聲影絕行落市僧

手拆賣起倉卒山房議估變嘉樹怕發掘予季靜者流耽  
幽畫癖結結隱愛雲林異境開恍惚四時植奇花三徑剪  
荏蘗咫尺對煙嵐天然圖畫出冷吟褰屐聯索居几硯潔  
秋堂寂無譁階下香泉咽我來磐石坐古心抱兀兀彈琴  
弄天風蕩漾松顛月

初夏小祇園對雨

獨坐終宵久未經蕭蕭雨逼一燈青消閒偶憶逃禪句誦  
與龍龕古佛聽

閒繙貝葉晚窻前纔讀楞迦一兩篇燈閃忽移衣上影瓶  
供蓮草數枝蓮

聲喧蕉葉雨絲絲索莫情懷睡較遲未轉五更幽夢斷亂

鶯喚起又催詩

麟鳳聲華最擅場，盍簪幾輩盛壺觴。三弇易主滄桑變，賸

有雲林十笏房。

前明爲瑯琊王氏家，庵曾結吟社于此。

同王石亭

鈞

何畹芳

蘭

訪毛羅照

上良

因同遊隆

### 福寺

潑墨雲頭起，山郭著力長。風吹不落鳩，聲纔罷鳥聲作斜。  
飛雨腳麤如索毛，生晝寢夢初回。喜聞剝啄詞客來縱談，  
今古懷抱開尋幽。共踏雙林苔隱隱，隔溪聞法鼓塔院擺。  
風鈴自語勝遊，冑爲泥濘阻日照松廊滴殘雨。

邀友人石湖看荷花分得杯字

滿湖似錦如霞色，入夏迎風映水開。潏潏紅波翻影去，微

微清吹送香來蜻蜒逐隊飛還止蛺蝶成團往復回幸有  
良朋邀共賞莫教急雨驟相催嬌容媚靨含情待煙嶼沙  
汀撥棹迴侵曉翠盤擎宿露淩波羅襪隔輕埃清芬我輩  
須題品綺思誰人妙剪裁自顧柰花無別策碧筒拌醉酒  
千杯

白鶴觀

孤鶴梳翎依峭磴石壇旛影臥縣淙道人不記生年月笑  
指階前手種松

德雲庵小憩四首

小庭清曉報蜂衙露重香浮白藕花爲約淵明須設酒忍  
寒典卻舊袈裟

禪悅詩情總可聽  
殿中旛閃佛燈青  
須知妙契真如者  
不在蓮花七卷經

隱囊禪榻竹簾垂  
長夏虛堂一局棋  
出自拈花迦葉手  
黑風白雨總相宜

亞檻榴花照眼新  
熏爐茗椀玉紋茵  
閒中爲續高僧傳  
添箇桑門愛馬人

酒旗

深巷誰家壓酒成  
微風搖曳一旗輕  
隔花招客原多態  
映柳當壚倍有情  
牽引清狂塵拇戰  
指揮紅友破愁城  
生憎飄蕩無知物  
斷送參軍又步兵

歌板

樂句相傳是小名繁音賴汝始分明身惟赴節隨高下道  
在從繩任重輕肯受人間呼散木曾經天上和新聲當年  
不是黃幡綽兩耳於今未譜成

花幔

廣庭長幔晝橫陳總爲名花巧製新何必朱幡求處士恍  
疑錦繖見夫人輕陰已足消紅日餘蔭猶堪護好春從此  
雨絲風片裏芳時宴賞可兼旬

書檠

秋宵初永向書堂靜熱蘭膏閱數行非汝誰能光簡策伴  
予自足煥文章螢囊可代終勤苦藜杖相傳亦渺茫怕見  
韓公舊詩句牆根拋棄最堪傷

古豔詩

謝家事事盡堪耽  
天氣清和月正三  
縹綠齊紈裁畫袴  
肉紅宮錦製春衫  
酒分瑤甕龍頭瀉  
簾捲香鉤鳳咮銜  
購得虎精期避魘  
種多蕙草愛宜男  
頌椒文思卿何讓  
詠絮才情我亦慙  
看到守宮顏愧覩  
探將抱肚語  
詰訕晨妝粉挹金  
鸞卯午睡鬟敲玉  
燕簪繡被詎期蒙  
代覆彩豪何幸荷  
親含步廊舊到猶  
能憶臥室新遷尙  
未諳豆蔻水涼教  
婢換芙蓉語隱任  
人參牆頭翠羽勞  
窺宋帳裏瓊人本  
姓甘惟憾殘宵佳  
夢短天明孔雀又  
東南

秋江詞

玉腕蕩蘭橈  
風波暮又朝  
綠情霜剪草  
紅暈月生潮  
潮生

復潮落蕩子天涯泊兩兩紫鴛鴦雙飛背人樂水爲佩雲  
爲裳白蘋冷碧藕香妾心不盡江上流郎心不定波上舟  
羅衾闌小夢珠淚滴殘秋一秋心一江水芙蓉花抱香死  
涼雲不流花滿地玉釵影溼霜光膩閒庭拜月月西沈燈  
掩殘紅睂鎖翠博山金鑪香裊絲絲絲繚繞如妾思煙消  
灰死頃刻盡所思那有斷絕時

秋夜西樓有貽

漏下已三更登樓望太清不知雲急去翻怪月東行竹露  
有時滴池螢忽自明長吟懷彼美迢遞隔層城

過湖上寺



前朝選佛場殿影漾湖光小雨松門靜新秋竹院涼棋從  
開士覆字向斷碑詳縷縷茶煙白如雲護石房

凌雲閣望太湖

簷覆蛟門樹窻吞鶴浦洲虹霓橫畧約日月出中流久抱  
凌雲想翻成勝地遊憑闌思著句松影一身秋

中秋山館獨坐對月感懷

涼波瀉長空萬里碧於水渺渺兮予懷杳不知所止夢冷  
紫瓊樓琴橫白石几古月照今心淡焉無爲耳  
散步嘯西風足踏古松影虛壑翻寒濤明蟾吐東嶺靜觀  
羣動機轉轉枯井葭蒼露白天斯人與秋永

風涼覺體輕露下知花重湘簾不上鉤疎星墮窻空柏竹

交寒翠一橫又一縱烏鵲忽驚飛余亦悄然恐

一年幾度圓一年幾回翫況復秋之中況復夜之半明鏡  
飛精光鑒人意歷亂芙蓉抱香心冷落金塘畔

浮雲終夜行輕颺暗飄送羅幌逼秋聲玉杵催寒弄出門  
神易傷入門影相共一几一胡牀風簷展書誦

悠悠何所思明明有如月一月引千思萬象變恍惚候蛩  
吟短砌入耳淒心骨霜林昨夜紅江上音塵闕

歲隼金粟枝托根廣寒府無心斫桂花虛擲修月斧綠雲  
漾寒空疑是羽衣舞圓靈抱魄生顧兔忙萬古

枕上口占

明滅殘燈斷續更單衾後夜覺秋生不知桐葉吹將盡侵

曉書窗減雨聲

捉雞行

荒雞喔喔柴扉剝啄有吏索租朱符火速三日斷爨那有  
餘粟吏怒如虎磨牙逐逐雞棲于塢呼童我捉老翁叩頭  
妻孥蔽簾抱雞出門免爾鞭扑寒更殘月低照破屋不聞  
雞鳴僅聞人哭

臥雲庵

嵐氣空濛竹徑長  
楸欄花發散幽香  
面山塔院無人到  
石上泉聲冷夕陽

遊小桃源

放艇穿雲石徑斜  
空池旂影走龍蛇  
幽禽隔葉但聞語  
古

樹無心也著花深院琴書消白晝層軒簾幙捲紅霞玉冠  
仙侶求題畫隔竹催烹餉客茶

戲詠泥美人四首

似此娉婷何處尋女媧故技尙遺今濃妝愛傅秦樓粉窄  
袖爭塗漢殿金問以方言應土語卿宜小謫有塵心每吟  
誰適爲容句獼髓鸞膠感不禁

辱在泥塗詎足誇箇人生小住東華塵寰未卜于歸處富  
媼由來阿母家獨守空帷如畫地每求佳耦類搏沙此身  
縱與金同價虛度芳年劇可嗟

城闌漫談女如雲卽此聊堪樂我員僻壤豈期終產汝紫  
泥端合讓封君心猶磐石貞難轉斜學春山淡不分何事

歡來頻捉搦嫣然一笑杳無聞

楚腰衛鬢逐時新幻出蓮花不染身知與地官何眷屬恍  
從后土見夫人碧城犀杳塵難避青冢魂歸畫不真何術  
卻消中婦妒綺窻終夜任橫陳

寒夜

風緊火無力圍鑪夜坐時月高人影小天遠鴈聲遲寒犬  
吠街柝微冰合硯池蠟梅消息近庭角有新枝

長吟

捲幔南窻下桐凋眼倍明輕風迴薄霧微雪作冬晴寒驟  
嫌衣重琴疎覺手生長吟聊自遣幾度繞廊行

陽湖門人洪亮吉編校

靈巖山人詩集卷二